

Jahresbericht 2007

Liebi Gwärblerinnen und liebi Gwärbler

Di beschti Nachricht voräväg:

Die flotti Fahrt vom KMU-Zug gaht au i däm Jahr wiiter, obwohl vereinzelti Züg es bitzeli langsamer underwägs sind!

Und di nöd so guet Nachricht grad no hindedrii:

Au jetzt und in Zuekunft isch dä Erfolg vo euis KMU's immer ganz direkt mit Chrampfe verbunde. Aber das isch Ihne wahrschinlich scho sälber uufgfall...

Mini sehr verehrte Damen und Herre

Die gueti wirtschaftlichi Situation haltet a, wobi sich einzelni Branchen über die dadurch bedingti Hektik bereits beklaget. Nach wie vor haltet dä Margedruck a und nöd wenigi Betrieb händ längers je meh Müeh, die nötige, hoch qualifizierte Fachlüüt z'akquiriere! Akzeptabli Erträg, ä stabili Personalsituation mit eme grosse Lehrstelleagebot und bedütend weniger Arbeitslosi wie scho lang nümme, schmöleret das Problem nöd!

Au wänn ä Branche übergreifendi Analyse vo dä wirtschaftliche Situation nume schwer möglich isch und branchspezifischi Unterschied üblich sind, chann mehrheitlich vonere positive Stimmig im Gwerb gredt werde! Die Uussag dörf jedoch nöd drüber hinwäg tüsche, dass i dä KMU nach wie vor um dä Undernämensgwünn g'kämpft werde muess! Dä allgegewartigi Priisdruck und d'Erwartige vo de Konsumänte, dass d'Leischtig möglichscht „billig“ statt „prieswert“ aabotte werde müend, unterstützed die unsympathischi Entwicklig.

Lokal tätigi Undernähme werdet au wiiterhin Werbig defür mache müesse, dass lokal i-kaufti Dienschtleischtige und

Produkt, au wänn sie in priislicher Hinsicht nöd immer mit em Usland konkurriere chönd, anderi Vorteil ufwiised! Spätischstens wänn mer mit eme usländische Produkt nöd z'friede isch, schätzt mer d'Vorteil vo dä lokale Unternämige!

Drum isch au in Zuekunft d'Chundenöchi, dä persönlicher Kontakt, di individuell Berätig, Flexibilität, Fründlichkeit, guet utbildeti und motivierti Lüt und vor allem die anderi Dienschtleistigsbereitschaft, d'Stürki vo eus Gwerbler!

Im Zug vo däne guete Ussichte, zeiged sich wie scho lgangs erwähnt bereits Engpäss bi dä Rekrutierig vom nötige Fachpersonal. D'Nachwuchsförderig und Bildigspolitik generell werdet zum politische Schlüsselgländ, wänn's drum gaht, d'Rahmebedingige für d' KMU z'verbessere! Ohni Fachpersonal und Nachwuchs chönnd d'Entwickligs- und d'Wachstumsmöglicheite vo dä KMU's nöd oder nur unzureichend gnutzt werde! Darum setzt sich d'Lehrstelle-Kommission wiiterhin mit unermüedlichen Isatz und vill Herzbluet für d'Förderig vo Lehrstelle i eusem Bezirk ii.

Dä BGV Dielsdorf angaschiert sich au wiiterhin aktiv und zäme mit em BGV Bülach i dä Flughafefrag. Dä Flughafen Chlote isch und bliibt nach wie vor wichtig für s'umliegende Gwerb und hört nöd a dä Bezirksgränze uf!

Eusi Firabigverastaltige dörf mer mit guetem Gwüsse als richtigi Highlights bezeichne. A dä Verastaltig mit em Thema „die Neue GmbH“ am 23.04.07 händ ca 70 Persone teilgnoo. Bi dä zweite Verastaltig vom 5. Novämber 07 wo sich em vielldiskutierte Thema „ Vo dä Bonitätsprüefig bis zur Betriebig“ gwidmet hätt, sind öppe 60 Persone awesend gsi! Mir wänd die Verastaltige au wiiterhin dureführe! Im Frühlig und im Herbscht werdet die Fierabigsverastaltige wiederum mit aktuelle und brisante Theme planet. Sie söllet wiiterhin en feschte Bestandteil vom BGV-Jahresprogramm sii und mir hoffed witerhin uf ä glücklicheri Hand bi dä Wahl vo dä Theme.

Mis Amt als Bezirks-Gwerbverband's Präsident dörf ich jetzt bereits sit drü Jahr uusüebe. Ich han wiederum es sehr lehrrichs und spannends Jahr erlebt. Usserordentlich interessant Begägnige mit Lüüt us Behörde, Politik und au us dä Wirtschaft belohnet eim für dä Isatz zu Gunste vom Gwerb!

Im vergangene Jahr sind Gschäft vom BGV a 4 Usschuss-Sitzige und vier Vorstands-Sitzige behandelt worde. Wieter han ich a 5 KGV-Sitzige und 9 Vorbereitis-Sitzige für d'Standortförderig Züri Underland teilgnoh. Zu mine Pflichte händ no diversi Aläss, wie z.B. Bsuech vo GV's und Gwerbe-Ustellige ghört.

Abschlüssend dörf ich säge, dass dä BGV Dielsdorf sin Platz im Bezirk als vertrauenswürdig Organisation wiiter hätt chöne usbaue und nach wie vor en ernscht gnone Partner für Behörde und Institutione isch. So chönd mir d'Wünsch und Aalige vom Gwerb optimal uf allne Ebene ibringe.

Das alles isch ja kein Wanmän-Schow: ich bedanke mich drum ganz herzlich bi mine Vorstandskollege für ihren Isatz für alli Gwerblerinne und Gwärbler im Bezirk und bi eui allne für die kollegiali und kameradschaftliche Zämearbet. Ich gange natürlich dävoos, dass ich wieterhin uf eui aktivi Understützig zähle dörf!

Eue Präsident, Jürg Sulser
Otelfingen, 13. Juni 2008